

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' MANSOR OTHMAN [NIBONG TEBAL]

TARIKH : 9 JULAI 2019 (RABU)

Dato' Mansor Othman [Nibong Tebal] minta **MENTERI KOMUNIKASI DAN MULTIMEDIA** menyatakan usaha-usaha Kementerian bagi tangani penyebaran meluas berita-berita palsu, sensitif dan kebencian yang boleh mengganggu gugat keharmonian masyarakat berbilang kaum dan kestabilan negara.

JAWAPAN

Tuan Yang Di-Pertua,

1. Untuk makluman Ahli Yang Berhormat, Jabatan Penyiaran Malaysia (RTM) melalui 4 saluran TV termasuk Saluran Berita Percubaan dan 33 saluran radio serta pelbagai perkhidmatan atas taliannya sentiasa membuat hebahan dan menyebarkan maklumat yang menyeluruh mengenai dasar, aktiviti dan program kerajaan agar rakyat mendapat fakta yang tepat dan sahih. Penyebaran informasi dilaksanakan melalui:

- a. Berita setiap jam melalui Radio & TV.
- b. Berita tebuk (*breaking news*) untuk melaporkan perkara penting semasa dari lapangan secara *real time*.
- c. 60 *crawler* berita sehari dalam semua slot berita sebagai maklumat tambahan.
- d. Rancangan bual bicara di Radio & TV yang disertai oleh penggubal dasar, agensi kerajaan, ahli akademik, pihak berautoriti untuk memberi penjelasan kepada rakyat mengenai dasar, program dan aktiviti kerajaan.

- e. Siaran radio di sepanjang masa menyebarkan maklumat dasar program dan aktiviti kerajaan melalui 'talking points' yang diselitkan di antara lagu-lagu yang disiarkan.
 - f. Aktiviti visual radio yang diadakan di lokasi-lokasi yang terpilih juga menyebarkan luas informasi kepada rakyat melalui kaedah bersemuka.
 - g. Rakaman rancangan bual bicara dimuat naik dalam siaran online RTM supaya rakyat dapat merujuk bahan-bahan yang telah disiarkan.
2. Kesemua langkah ini adalah bertujuan untuk mendorong rakyat mendapat manfaat daripada dasar kerajaan.
3. Kandungan berita RTM yang diterbitkan berdasarkan garis panduan penerbitan berita, garis panduan siaran TV, fakta sebenar dan sumber yang sahih, sesuai dengan tagline yang digunakan rancangan berita di TV dan radio iaitu, #YangSahihdiRTM.

Tuan Yang Dipertua,

4. BERNAMA dalam hal yang sama turut memantau berita-berita palsu dan sensitif. Dalam masa sama, BERNAMA telah mengambil inisiatif memberi gambaran sebenar dengan menyebarkan luaskan fakta dan berita sahih supaya masyarakat dapat memperolehi berita yang berautoriti. Penghasilan berita dan laporan khas juga dihasilkan berkonsepkan kemakmuran bersama meliputi masyarakat berbilang kaum termasuk kumpulan minoriti dan etnik kaum Sabah dan Sarawak.
5. Laporan berita-berita ini disiarkan menerusi platform konvensional dan media sosial BERNAMA termasuk saluran *Bername News Channel* (BNC) dan Bernama Radio.

6. Pada masa yang sama, Jabatan Penerangan Malaysia (JaPen) juga sedang giat menjalankan kerjasama dengan kementerian berkaitan bagi menjelaskan sesuatu isu di peringkat akar umbi. Penerangan berkenaan isu dilaksanakan melalui strategi komunikasi yang terancang dan berkesan untuk memastikan pelaksanaan dasar kerajaan dapat meningkatkan keyakinan rakyat terhadap kerajaan.

7. Skop penerangan ini merangkumi aspek menguar-uarkan inisiatif dan kejayaan kerajaan menerusi program advocacy, engagement dan outreach di seluruh negara.

8. Selain itu, penjelasan berkenaan berita-berita palsu dan sensitif ini akan turut dilakukan melalui infografik, karikatur dan penerbitan video pendek yang dimuat naik ke dalam media sosial.